

Saehyinx Seiziq

童年趣事

Seiziq dwg hot sei gyaendei ndeu, seiziq dwg diuz go ndeidingq ndeu, seiziq lijdwg cek saw gojgaeq ndeiyawj ndeu.

Mwh gou seiq bi, ciengzseiz dingqnyi vunzhung naeuz: “Ndaem gve ndaej gve, ndaem duh ndaej duh.” Gou cei q gyaed gwn dangzrwi lo, gou naemj: “Gyoengq rwi caen huk ha, cigsoh aeu dangzrwi ndaem roengz namh bae couh ndaej haujlai dangzrwi lo.” Yienghneix gou daj ndaw ranz aeu di dangzrwi he, youq ndaw batva vat aen congh ndeu, aeu dangzrwi baenz di baenz di cuengq haeujbae, caiq haem aen congh ndei, yienzhaeuh gou couh caj sou dangzrwi lo.

Aen singhgiz ndeu, song aen

singhgiz, sam aen singhgiz gvaqbae lo, dangzrwi lijdwg caengz maj okdaeuj, gou gaenjgip lo, deq mbouj ndaej bae vat dangzrwi okdaeuj. “Ya! Dangzrwi, dangzrwi gou bae gizlawz lo? Dangzrwi guhlawz mbouj raen lo?” Gou daejnga’ nga hwnjdaeuj: “Nga nga nga……Dangzrwi gou mbouj raen lo, mbouj raen lo……Nga nga nga……Byawz caeg gwn dangzrwi gou?” Mwh neix daxmeh gvaqdaeuj cam: “Lwg ha, mwngz guhlawz lo?” Gou ciengzsaeg lwnh daxmeh, daxmeh daej riu mbouj ndaej, doiq gou naeuz: “Lwg huk ha, dwg duzmoed gwn dangzrwi mwngz lo, caiqlj dangzrwi ndaem mbouj baenz go.” Daxmeh gangj liux gou cij rox.

Lij miz baez ndeu, daxmeh bonjlaiz caepcawq daiq gou bae daet byoem, hoeng de laemzseiz miz saeh okbae lo, seizgei ndei! Gou ra ma faggeuz daet byoem caeuq aen roi ndeu, cang bonjfaenh dwg cangh-feigyaeuj, daet byoem hawj duzyou-baengz. Gou roi byoem duzyoubaengz roengzdaeuj gonq, yungh faggeuz daet byoem baihsuix bae, caiq bae daet baihgva, doeklaeng raen song mbiengj daet ndaej mbouj caezcingj, gou youh daet bae daet dauq. Daet baihsuix mbat ndeu, daet baihgva mbat ndeu, byoem duzyoubaengz yied daeuj yied noix, hoeng lijdwg daet ndaej mbouj ndei yawj. Doeklaeng mbouj siujsim, gyaedj duzyoubaengz



deng gou daet ndoq liux lo. Daxmeh dauqma raen gwnz dieg luenhlablab, youh raen gij “cozbinj” gou, ndaq gou donq ndeu.

Gou baez naemj daengz song gienh saeh huk seiziq guh haenx, couh riuha. Gyoengq baengzyoux, gyoengqsou miz maz saehyinx mbouj? (Dangz Yisenh)

Duzmoed Bienq Hung Lo

小蚂蚁变大了

Duzmoed iq Cunghcungh baez ndiu gvaqdaeuj, caepcawq bae ra haeuxgwn. De baez okdou, raen gofaex hung henzgyawj lij daemq gvaq de, Cunghcungh angq raixcaix, bienq hung dwg aen siengmuengh de.

“Doxboh, daxmeh……” Cunghcungh swenj, aen rongzmoed cungj yaek deng gij sing neix saenqdaenh doemq lo. Gyoengq moed vuengmuengz buet ok bak-congh, raen gaiq ga hung gvaq gyoengqde bak lai boix, gyoengq moed ngiengx gyaedj, cij rox dwg Cunghcungh. “Cunghcungh, Cunghcungh!” Daxboh daxmeh doeksat hemq, “mwngz guhlawz bienq hung lo?” Hoeng, Cunghcungh gaenbonj dingq mbouj nyi. Yienghneix, geij fanh duzmoed caez hemq, Cunghcungh dingqnyi lo, ngaem gyaedj roengzdaeuj: “Gou hix mbouj rox guhlawz bienq ndaej baenzneix hung.”

Duzmoed ndeu naeuz: “Raeuz hwnj gwnz ndang Cunghcungh bae guh-caemz ba.” “Ndei ha, ndei ha.” Caezgya cungj benz daengz gwnz ndang

Cungh- cungh bae. Yaepyt gwnz ndang Cunghcungh nauhyied dangqmaz, mbangj duzmoed humx gyaedj Cunghcungh buet; mbangj duzmoed youq angjfwngz Cunghcungh diuq; mbangj duzmoed youq gwnz din doxdax, danghnaeuz byawz deng dik doek roengz gwnz dieg, byawz couh saw……Caezgya vuenheij dangqmaz! Cunghcungh baeg lo, naemj haeuj ndaw rongz bae ninz. Caezgya muengz lanz Cunghcungh: “Gaej haeujbae, mwngz hung lai lo, aen ranz haengjidingh deng mwngz at vaih.” Cunghcungh cij ndaej bae gwnz diegnywj ninz.

Ngoenz daihngeih haetromh, Cunghcungh singj lo, raen bonjfaenh youh bienq dauq yiengh-gaeuq lo, lumjbaenz ngoenzlwenz dwg guh fangzhwnz nei.

(Cuh Anh)

Gou bienq hung lo……



Vat Maenz 挖红薯

Daxboh daxmeh hai ci daiq gou bae daengz aen suen byaek henz singz ndeu, gizneix youh gvangq youh gyaendei, ndit ciuq go’ byaek dox-caez majhung. Byaekhau hausag-sag, lwgmanh ndingfwdfwd, lwgfaeg bizbodbod, lwgbieng gwnz gyaedj miz dujva iq ndeu……Yi, gaiq dieg gau mbaw mwnhoengh haenx dwg byaek gijmaz ha, gou lumjbaenz mbouj raen gvaq, hix mbouj gwn gvaq. Bohlunz guhnaz riu lwnh dou, gizhaenx dwg maenz, gyoengqde ndoj youq laj namh, gau mbaw baihgwnz dwg gij “cang”, gyoengqde. Bohlunz lij naeuz: “Cingqngamj maenz baenz lo, gyoengqsou bae vat maenz ndaej.” Gyoengq doengzdoidh dingq le, angq dwk diuq hwnjdaeuj.

Bohlunz ra ma fagliemz, fagluj, faggvak iq caeuq aenlamz, daiq dou bae vat maenz. De yungh fagliemz gvej gau mbaw maenz bae, yienz-haeuh yungh fagluj vat hai ndaek namh hung, maenz couh loh okdaeuj lo, caiq yungh faggvak iq menhmenh vat namh henz aen maenz, yaep ndeu couh vat aen maenz hung ndeu okdaeuj cuengq roengz aenlamz bae. Ndei lai lo, gou ganjgip hag vat maenz, hoeng fagluj miz di naek, namh hix geng lai, gou song fwngz

gaem fagluj yungh rengz vat namh, gig mbouj yungzheih vat hai di, hoeng ndaw namh mbouj raen saek aen maenz. Maenz ndoj ndaej caen maenh, gou youh yungh faggvak iq laebdaeb vat roengzbae, cij raen aen maenz iq ndeu loh gyaedj okdaeuj, gou cuengq faggvak roengzdaeuj yungh fwngz menhmenh gvat namh, caj aen maenz loh byongh aen le, gou song fwngz gaemdawz de, lumj lod lauxbaeg nei, aen maenz yaepyt couh deng gou lod okdaeuj lo, yawj gij cingzciak guhhong bonjfaenh, gou ndawsim diemzsubsub.

Gij maenz dou vat okdaeuj miz aen bizbodbod, raezrangrang, lij raez gvaq fajfwngz vunzhung; hix miz aen byombyangbyang, iquetet, dinj gvaq fajfwngz gou. Dou doq vat doq ganggoj, gwnz ndang caeuq gwnz haiz cungj nem namh liux, ndaw reih maenz sing riu goksa.

Dauqma daengz ranz, daxmeh swiq maenz seuq, aeu haeuj ndaw gaujsiengh bae, yaep ndeu, ndaw ranz couh miz feih maenz rangfwtfwt. Maenz gangq baenz le, gou gwn aen hung ndeu, caen van raixcaix!

[Baekging Si Cunghgvanh-cunh Daihsam Siujyoz Sam(12) Cunghdui Hoz Gwngjmingz]